

Na osnovu člana 16. stav 4. Zakona o Vladi Zeničko - dobojskog kantona - Prečišćeni tekst („Službene novine Zeničko-dobojskog kantona, broj: 7/10), člana 63. stav (2) Zakona o turizmu (“Službene novine Zeničko-dobojskog kantona”, broj: 12/22), na prijedlog Ministarstva za privredu, Vlada Zeničko-dobojskog kantona, na 167. sjednici, održanoj dana 11.08.2022. godine, d o n o s i

ZAKLJUČAK

I.

Utvrđuje se Prijedlog Odluke o osnivanju Turističke zajednice Zeničko-dobojskog kantona.

II.

Prijedlog Odluke iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

PREMIJER

Mirnes Bašić

Broj: 02-_____/22
Datum, 11.08.2022. godine
Z e n i c a

DOSTAVLJENO:

1x Ministarstvo za privredu,
1x Stručna služba Skupštine,
1x a/a.

PRIJEDLOG

Na osnovu člana 37. stav (1) tačka f) Ustava Zeničko-dobojskog kantona, a u vezi sa članom 63. stav (2) Zakona o turizmu („Službene novine Zeničko-dobojskog kantona“, broj: 12/22), Skupština Zeničko-dobojskog kantona, na ____ . sjednici, održanoj ____ .2022. godine, donosi:

ODLUKU O OSNIVANJU TURISTIČKE ZAJEDNICE ZENIČKO-DOBOJSKOG KANTONA

DIO I - OSNOVNE ODREDBE

Član 1.

(Predmet Odluke)

- (1) Ovom odlukom osniva se Turistička zajednica Zeničko-dobojskog kantona.
- (2) Osnivač Turističke zajednice Zeničko-dobojskog kantona (u daljem tekstu: Turistička zajednica) je Skupština Zeničko-dobojskog kantona.

Član 2.

(Naziv, pravni status i sjedište Turističke zajednice)

- (1) Naziv Turističke zajednice glasi: Turistička zajednica Zeničko-dobojskog kantona.
- (2) Skraćeni naziv Turističke zajednice Kantona je: **TZ ZDK**.
- (3) Turistička zajednica ima svojstvo pravnog lica i upisuje se u sudski registar.
- (4) Rad Turističke zajednice je javan.
- (5) Sjedište Turističke zajednice je u Zenici, ulica Kučukovići broj 2.

Član 3.

(Pečat i štambilj)

- (1) Turistička zajednica ima pečat i štambilj.
- (2) Dimenzije, oblik i sadržaj pečata i štambilja će biti propisani statutom.
- (3) Bliže odredbe koje se odnose na broj, upotrebu i čuvanje pečata i štambilja zajednice uređuju se statutom i aktima direktora Turističke zajednice.

DIO II - CILJEVI I DJELATNOST TURISTIČKE ZAJEDNICE

Član 4.

(Svrha osnivanja Turističke zajednice)

Turistička zajednica se osniva radi razvoja, unapređenja i promocije turizma na području Zeničko-dobojskog kantona (u daljem tekstu: Kanton) u cjelini i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu sa turizmom.

Član 5.

(Ciljevi osnivanja Turističke zajednice)

Ciljevi osnivanja Turističke zajednice su:

- a) unapređenje općih uslova boravka turista kroz formiranje cjelovite turističke ponude, podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta jedinica lokalne samouprave;
- b) razvijanje svijesti o važnosti turizma, kao i privrednim, društvenim i drugim efektima

- turizma, o potrebi i važnosti očuvanja i unapređenja svih elemenata turističkog proizvoda, a posebno zaštite životne sredine;
- c) podsticanje razvoja turističke infrastrukture i pružanja informacija turistima;
 - d) promocija turističkog proizvoda u Kantonu.

Član 6.

(Djelatnost i zadaci Turističke zajednice)

- (1) Djelatnost Turističke zajednice se zasniva na načelu ostvarivanja javnog interesa u oblasti turizma, čiji je osnovni cilj promocija turizma na području Kantona, bez ostvarivanja neposredne dobiti.
- (2) Djelatnosti Turističke zajednice prema Odluci o klasifikaciji djelatnosti Bosne i Hercegovine („Službeni glasnik BiH“, broj 47/10) su:
 - 46.19 Posredovanje u trgovini raznovrsnim proizvodima,
 - 47.91 Trgovina na malo preko pošte ili interneta,
 - 47.99 Ostala trgovina na malo izvan prodavnica, štandova i tržnica,
 - 49.39 Ostali kopneni prijevoz putnika, d.n.,
 - 52.29 Ostale pomoćne djelatnosti u prijevozu;
 - 58.14 Izdavanje časopisa i periodičnih publikacija,
 - 58.19 Ostala izdavačka djelatnost,
 - 59.20 Djelatnost snimanja zvučnih zapisa i izdavanja muzičkih zapisa,
 - 63.12 Internetski portali,
 - 63.99 Ostale informacijske uslužne djelatnosti, d.n.,
 - 66.19 Ostale pomoćne djelatnosti kod finansijskih usluga, osim osiguranja i penzijskih fondova,
 - 68.32 Upravljanje nekretninama uz naknadu ili na osnovi ugovora,
 - 70.10 Upravljačke djelatnosti,
 - 70.21 Odnosi s javnošću i djelatnosti saopštavanja,
 - 70.22 Savjetovanje u vezi s poslovanjem i ostalim upravljanjem,
 - 73.11 Agencije za promociju (reklamu i propagandu),
 - 73.12 Oglašavanje preko medija,
 - 73.20 Istraživanje tržišta i ispitivanje javnog mnijenja,
 - 74.90 Ostale stručne, znanstvene i tehničke djelatnosti, d.n.,
 - 77.21 Iznajmljivanje i davanje u zakup (leasing) opreme za rekreaciju i sport
 - 77.29 Iznajmljivanje i davanje u zakup (leasing) ostalih predmeta za ličnu upotrebu i kućanstvo,
 - 77.39 Iznajmljivanje i davanje u zakup (leasing) ostalih mašina, opreme i materijalnih dobara, d.n.,
 - 77.40 Iznajmljivanje i davanje u zakup (leasing) prava na upotrebu intelektualnog vlasništva i sličnih proizvoda, osim radova koji su zaštićeni autorskim pravima,
 - 78.30 Ostalo ustupanje ljudskih resursa,
 - 79.90 Ostale rezervacijske usluge i djelatnosti povezane s njima,
 - 82.11 Kombinovane uredske administrativne uslužne djelatnosti,
 - 82.19 Fotokopiranje, priprema dokumenata i ostale specijalizirane uredske pomoćne djelatnosti,
 - 82.30 Organizacija sastanaka i poslovnih sajmova,
 - 82.92 Djelatnosti pakiranja,
 - 82.99 Ostale poslovne pomoćne uslužne djelatnosti, d.n.,

- 84.12 Regulisanje djelatnosti javnih subjekata koji pružaju zdravstvenu zaštitu, usluge u obrazovanju i kulturi i druge društvene usluge, osim obaveznog socijalnog osiguranja,
- 84.13 Regulisanje i doprinos poboljšavanju poslovanja u privredi,
- 85.59 Ostalo obrazovanje i poučavanje, d.n.,
- 90.04 Rad umjetničkih objekata,
- 91.03 Rad povijesnih mjesta i građevina te sličnih znamenitosti za posjetioce,
- 93.11 Rad sportskih objekata,
- 93.19 Ostale sportske djelatnosti,
- 93.21 Djelatnosti zabavnih i tematskih parkova,
- 93.29 Ostale zabavne i rekreacijske djelatnosti,
- 94.11 Djelatnosti poslovnih organizacija i udruženja poslodavaca.

(3) Osnovni zadaci Turističke zajednice su:

- a) objedinjava turističku ponudu;
- b) upravlja javnom turističkom infrastrukturu danom na upravljanje;
- c) preduzima mjere i aktivnosti na kreiranju turističkog proizvoda i turističkog imidža, kao i radnje na formiranju marke turističkog proizvoda destinacije;
- d) radi na promociji, plasmanu i podršci realizacije turističkog proizvoda, kao i pojedinih njegovih dijelova, vrijednosti i usluga, koji čine integralni turistički proizvod;
- e) vrši promociju plansko-projektne, plansko-razvojne i investicione dokumentacije iz oblasti turizma i njima komplementarnih djelatnosti;
- f) radi na kontinuiranom inoviranju turističkog proizvoda i aktiviranju novih turističkih prostora;
- g) sarađuje u aktivnostima i poslovima vezanim za standardizaciju, kategorizaciju i klasifikaciju turističkog proizvoda, usluga i objekata;
- h) radi na istraživanju turističkog tržišta u cilju pozicioniranja turističkog proizvoda na turističkom tržištu;
- i) prati stanje na turističkom tržištu u cilju blagovremenog donošenja odgovarajućih odluka;
- j) preduzima mjere i aktivnosti za razvoj i promociju turizma u turistički nerazvijenim dijelovima Kantona;
- k) obavlja informativne poslove u vezi sa turističkom ponudom i promoviše turističke ponude Kantona u zemlji i inozemstvu;
- l) sarađuje sa turističkim zajednicama u Bosni i Hercegovini, u zemljama u okruženju, Evropi i svijetu;
- m) sarađuje sa putničkim agencijama i ustanovama za zaštićena prirodna i historijska područja, vezano za turističke posjete i obilaske zaštićenih područja;
- n) podstiče, unapređuje, promoviše i štiti izvorne vrijednosti i stvara uslove za njihovo korištenje u granicama održivog razvoja turizma;
- o) koordinira na poslovima razvoja turizma na lokalnom, kantonalnom, entitetskom i državnom nivou;
- p) radi na razvoju gostoprimstva, očuvanju prirodnih i kulturno-historijskih vrijednosti i unapređenju ekološke zaštite prostora na kojem djeluju;
- r) radi na pripremi i implementaciji događaja od važnosti za Zeničko-dobojski kanton;
- s) obavlja i druge poslove koji su u funkciji razvoja turizma i koji nisu u suprotnosti sa Zakonom o turizmu („Službene novine Zeničko-dobojskog

kantona“, broj: 12/22), ovom odlukom, statutom i li drugim propisom.

(4) Izuzetno od stava (1) ovog člana, Turistička zajednica može da:

- a) upravlja dobrima i resursima koji su joj dati na upravljanje odlukom osnivača u skladu sa posebnim propisima (izletišta, lovišta, parkovi, plaže, jezera, rijeke, prirodno i kulturno-historijsko nasljeđe),
- b) organizira manifestacije i priredbe,
- c) objavljuje turističke komercijalne oglase u oglasnim medijima,
- d) prodaje suvenire, ulaznice, turističke karte i brošure, osim sopstvenog promotivnog materijala,
- e) obavlja i druge poslove od javnog interesa koji su u funkciji razvoja turizma i koji nisu u suprotnosti sa Zakonom o turizmu („Službene novine Zeničko-dobojskog kantona“, broj: 12/22, u daljem tekstu: Zakon), ovom odlukom, statutom ili drugim propisom koji reguliše oblast turizma.

Član 7.

(Ovlaštenja u pravnom prometu)

Turistička zajednica u pravnom prometu sa trećim licima istupa kao jedinstveni pravni subjekt u svoje ime i za svoj račun, bez ograničenja u okviru svoje djelatnosti.

DIO III - ORGANI TURISTIČKE ZAJEDNICE

Član 8.

(Organi Turističke zajednice)

(1) Organi Turističke zajednice su:

- a) Nadzorni odbor,
- b) Direktor i
- c) Turističko vijeće.

(2) Članovi organa Turističke zajednice Kantona odgovorni su za zakonito i savjesno obavljanje svojih dužnosti.

Član 9.

(Mandat članova organa Turističke zajednice)

- (1) Članovi organa Turističke zajednice iz člana 8. stav (1) tačke a) i b) ove odluke imenuju se na period od četiri godine i mogu biti ponovo imenovani, najviše na još jedan mandat.
- (2) U slučaju prestanka mandata člana Nadzornog odbora, prije isteka vremena na koje je biran, novi član se bira na vrijeme do isteka mandata na koji je izabran prethodnik.

Član 10.

(Nadzorni odbor)

- (1) Nadzorni odbor Turističke zajednice ima tri člana.
- (2) U Nadzorni odbor obavezno se imenuje jedan predstavnik ispred osnivača, a ostali članovi se imenuju iz reda naučnih i stručnih lica iz oblasti turizma.
- (3) Članovi Nadzornog odbora imenuju se putem javnog oglasa u skladu sa Zakonom o ministarskim, vladinim i drugim imenovanjima u Federaciji BiH („Službene novine Federacije BiH“, broj: 12/03, 34/03 i 65/13).
- (4) Nadzorni odbor iz reda svojih članova bira predsjednika.
- (5) Članovi Nadzornog odbora, pored općih uvjeta propisanih zakonom, trebaju ispunjavati i posebne uvjete:

- a) VSS-VII stepen stručne spreme ili drugi ili treći ciklus Bolonjskog sistema obrazovanja,
- b) najmanje 5 godina radnog iskustva nakon sticanja VSS.

Član 11.

(Nadležnost Nadzornog odbora)

- (1) Nadzorni odbor:
 - a) donosi statut Turističke zajednice,
 - b) donosi poslovnik o svome radu,
 - c) podnosi godišnji program rada sa finansijskim planom,
 - d) podnosi godišnji izvještaj o poslovanju i finansijski izvještaj,
 - e) donosi pravilnik o radu;
 - f) odlučuje o korištenju sredstava u skladu sa Zakonom i statutom,
 - g) donosi druge opće akte u skladu sa Zakonom i statutom Turističke zajednice,
 - h) obavlja i druge poslove u skladu sa Zakonom i statutom.
- (2) Nadzorni odbor akte iz stava (1) tačka a) i e) ovog člana dostavlja Vladi Kantona na prethodnu saglasnost putem Ministarstva.
- (3) Članove Nadzornog odbora imenuje i razrješava Vlada Zeničko-dobojskog kantona (u daljem tekstu: Vlada Kantona) na prijedlog Ministarstva za privredu Zeničko-dobojskog kantona (u daljem tekstu: Ministarstvo), u skladu sa ovom odlukom i statutom Turističke zajednice.
- (4) Način imenovanja članova i način rada Nadzornog odbora bliže se uređuju statutom Turističke zajednice.

Član 12.

(Direktor Turističke zajednice)

- (1) Direktora Turističke zajednice imenuje Vlada Kantona na prijedlog Ministarstva.
- (2) Direktor se imenuje na period od četiri godine putem javnog oglasa u skladu sa Zakonom o ministarskim, vladinim i drugim imenovanjima u Federaciji BiH, a može biti ponovo imenovan najviše još jedan mandat.
- (3) Direktor Turističke zajednice:
 - a) predstavlja i zastupa Turističku zajednicu,
 - b) organizira i rukovodi radom i poslovanjem Turističke zajednice,
 - c) predlaže akte koje donosi Nadzorni odbor,
 - d) izvršava odluke Nadzornog odbora i preduzima mjere za njihovo provođenje,
 - e) stara se o zakonitosti rada,
 - f) odgovara za korištenje i raspolaganje imovinom,
 - g) vrši i druge poslove utvrđene zakonom i statutom.
- (4) Direktor Turističke zajednice mora da posjeduje:
 - a) VSS-VII stepen stručne spreme ili drugi ili treći ciklus Bolonjskog sistema obrazovanja,
 - b) najmanje 3 godine radnog iskustva nakon sticanja VSS.
- (5) Način izbora i razrješjenja direktora detaljnije se reguliše statutom Turističke zajednice.

Član 13.

(Turističko vijeće Turističke zajednice)

- (1) Turističko vijeće Turističke zajednice formira Direktor Turističke zajednice.
- (2) Turističko vijeće čine Direktor Turističke zajednice, direktor turističke zajednice

općine/grada ili ovlašteni predstavnik općinske/gradske službe nadležne za oblast turizma, te jedan predstavnik Ministarstva.

- (3) Turističko vijeće imenuje se na period od 4 godine, sa mogućnošću ponovnog imenovanja.
- (4) Direktor Turističke zajednice obnaša ulogu predsjednika Turističkog vijeća.
- (5) Turističko vijeće donosi poslovnik o radu.
- (6) Turističko vijeće obavlja sljedeće poslove:
 - a) usaglašava stavove prema zajedničkim promotivnim aktivnostima svih turističkih zajednica u Zeničko-dobojskom kantonu u njihovom zajedničkom nastupu na turističkim tržištima, razmatra i druga pitanja u vezi sa razvojem turizma u skladu sa Zakonom i drugim propisima,
 - b) usaglašava stavove po pitanju razvoja cjelovite turističke ponude, podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta Zeničko-dobojskog Kantona,
 - c) usaglašava stavove po pitanju turističke infrastrukture čija izgradnja se finansira iz budžeta Zeničko-dobojskog kantona,
 - d) dostavlja Ministarstvu mišljenje o visini boravišne takse, visini godišnjeg paušalnog iznosa boravišne takse,
 - e) predlaže pravilnik kojim će se propisati bliži uslovi i kriteriji za proglašavanje turističkog mjesta.
- (7) U obavljanju poslova iz stava (6) ovog člana Turističko vijeće je obavezno da održi sjednicu prema potrebi, a najmanje 4 puta u toku godine.
- (8) U roku od 15 dana od dana završetka sjednice, Turističko vijeće je u obavezi da dostavi izvještaj Ministarstvu koji sadrži prijedlog mjera i zaključke o održanim aktivnostima iz stava (6) ovog člana.
- (9) Način formiranja Turističkog vijeća detaljnije se reguliše statutom Turističke zajednice.

Član 14.

(Organizacija, način rada, prava i obaveze uposlenih)

- (1) Turistička zajednica je pravni subjekt organizovana na funkcionalnom principu, čime se omogućava efikasnost u radu i upravljanju, operativnost u donošenju odluka i obaveznost njihovog provođenja.
- (2) Pitanja u vezi sa organizacijom, načinom rada i funkcionisanjem Turističke zajednice bliže će se urediti statutom i posebnim aktom u skladu sa Zakonom, ovom odlukom i propisima koji regulišu oblast radnih odnosa.

DIO IV - FINANSIRANJE TURISTIČKE ZAJEDNICE

Član 15.

(Sredstva za rad Turističke zajednice)

- (1) Sredstva za rad Turističke zajednice osiguravaju se:
 - a) iz budžeta Kantona
 - b) iz prihoda ostvarenih preraspodjelom boravišne takse;
 - c) iz prihoda od obavljanja djelatnosti iz člana 6. stav (2), (3) i (4) ove odluke;
 - d) iz prihoda po osnovu učešća u domaćim i međunarodnim programima saradnje;
 - e) iz donacija;

- f) iz kreditnih zaduženja uz prethodnu saglasnost osnivača;
- g) iz prihoda iz drugih izvora.
- (2) Višak prihoda nad rashodima Turistička zajednica koristi za obnavljanje, unapređivanje i razvoj svoje djelatnosti.
- (3) Turistička zajednica se može, na osnovu posebne odluke nadzornog odbora, uz prethodnu saglasnost osnivača, finansijski zaduživati u cilju realizacije programa rada i finansijskog plana, ali ukupna vrijednost zaduženja ne smije prelaziti 25% finansijskim planom predviđenih prihoda.
- (4) Pored izvora prihoda navedenih u stavu (1) ovog člana, poslovanje ili pojedine aktivnosti Turističke zajednice mogu se finansirati i dodatnim sredstvima koja osiguravaju druge zainteresirane organizacije.

Član 16.

(Odgovornost za obaveze)

- (1) Za svoje obaveze Turistička zajednica odgovara sredstvima sa kojima raspolaže.
- (2) Osnivač ne odgovara za obaveze Turističke zajednice.

DIO V - AKTI TURISTIČKE ZAJEDNICE

Član 17.

(Akti Turističke zajednice)

Akti Turističke zajednice su statut i drugi opći akti kojima se regulišu odnosi u Turističkoj zajednici.

Član 18.

(Statut Turističke zajednice)

- (1) Prava i obaveze Turističke zajednice utvrđuju se Zakonom i statutom Turističke zajednice.
- (2) Statut Turističke zajednice sadrži odredbe kojima se bliže uređuje:
 - a) naziv i sjedište,
 - b) oblik i sadržaj pečata i štambilja, te obilježja Turističke zajednice,
 - c) djelatnosti i zadaci Turističke zajednice,
 - d) prava, obaveze i odgovornosti zaposlenih,
 - e) način predstavljanja i zastupanja Turističke zajednice,
 - f) djelokrug, organizacija, način izbora i opoziva, mandat te odgovornost članova organa Turističke zajednice,
 - g) način odlučivanja u turističkoj zajednici i organima Turističke zajednice,
 - h) način ostvarivanja javnosti rada,
 - i) način donošenja statuta i drugih općih akata,
 - j) imovina, način sticanja imovine i raspolaganja imovinom,
 - k) postupak sa imovinom u slučaju prestanka Turističke zajednice,
 - l) druga pitanja od značaja za djelovanje Turističke zajednice.
- (3) Statut i odluku o izmjenama i dopunama statuta donosi Nadzorni odbor na način propisan članom 11. stav (2) ove odluke.
- (4) Ako Turistička zajednica ne donese statut, odnosno odluku o izmjenama i dopunama statuta u roku od mjesec dana, od dana prijema saglasnosti iz stava (3) ovog člana, smatrati će se da saglasnost nije ni data.
- (5) Statut Turističke zajednice i njegove izmjene i dopune objavljuju se u „Službenim novinama Zeničko-dobojskog kantona“.

DIO VI - NADZOR NAD RADOM I PRESTANAK POSTOJANJA TURISTIČKE ZAJEDNICE

Član 19.

(Nadzor nad radom Turističke zajednice)

- (1) Nadzor nad radom organa Turističke zajednice obavlja Ministarstvo i Kantonalna uprava za inspekcijske poslove.
- (2) Ministarstvo nadzire zakonitost rada, zakonitost akata i stepen izvršenja programa rada Turističke zajednice.
- (3) U vršenju nadzora Ministarstvo je ovlašteno da:
 - a) zahtjeva izvještaje i podatke o radu,
 - b) utvrdi stanje izvršavanja poslova, upozori na uočene nepravilnosti i odredi mjere i rokove za njihovo otklanjanje,
 - c) izdaje instrukcije,
 - d) naloži poduzimanje poslova koje smatra potrebnim,
 - e) pokrene postupak za utvrđivanje odgovornosti,
 - f) obavjesti nadležnu inspekciju u skladu sa posebnim zakonom,
 - g) predloži Vladi Kantona da poduzme mjere za koje je ovlaštena.
- (4) Turistička zajednica dužna je omogućiti Ministarstvu provedbu nadzora, te mu dostaviti ili pripremiti tačne i potpune izvještaje, podatke, materijale i drugu dokumentaciju iz stava (3) ovog člana.
- (5) U slučaju da organi Turističke zajednice postupe suprotno odredbama ove odluke i Zakona, Ministarstvo će uputiti prijedlog Vladi Kantona za pokretanje postupka utvrđivanja njihove odgovornosti.
- (6) U vršenju nadzora iz stava (1) ovog člana Ministarstvo je obavezno dostaviti Vladi Kantona godišnju informaciju o realiziranim projektima Turističke zajednice koji su finansirani iz sredstava javnih prihoda.

Član 20.

(Trajanje i prestanak rada Turističke zajednice)

- (1) Turistička zajednica se osniva na neodređeno vrijeme.
- (2) Turistička zajednica prestaje da postoji na osnovu:
 - a) odluke Skupštine Kantona o prestanku postojanja Turističke zajednice;
 - b) odluke Skupštine Kantona o zabrani djelovanja Turističke zajednice.
- (3) Odluku iz stava (2) tačka b) ovog člana, Skupština Kantona donosi iz sljedećih razloga:
 - a) ako Turistička zajednica donosi opće akte suprotno Zakonu, statutu ili drugom propisu, ili zbog povreda Zakona i drugih propisa,
 - b) ako ne izvrši mjere koje je naložio osnivač.

DIO VII - PRIJELAZNE I ZAVRŠNE ODREDBE

Član 21.

(Imenovanje nadzornog odbora i direktora na kraći period)

- (1) Vlada Kantona će, u roku od 15 dana od dana stupanja na snagu ove odluke, na kraći period utvrđen Zakonom o ministarskim, vladinim i drugim imenovanjima u

Federaciji BiH, imenovati nadzorni odbor i vršioca dužnosti direktora.

- (2) Vršilac dužnosti direktora ovlašten je predati prijavu za upis u sudski registar i preduzeti ostale potrebne radnje u vezi sa podnesenom prijavom i zaključcima suda i da preuzme rješenje po osnivanju.
- (3) Nadzorni odbor će donijeti statut Turističke zajednice i poslovnik o radu, uz saglasnost Vlade Kantona, najkasnije u roku od 60 dana od dana imenovanja Nadzornog odbora.

Član 22.

(Troškovi osnivanja i početak rada)

- (1) Troškove osnivanja Turističke zajednice snosi Ministarstvo.
- (2) Turistička zajednica počinje sa radom danom upisa u sudski registar.

Član 23.

(Ostala pitanja)

U pogledu ostalih pitanja u radu Turističke zajednice, koja nisu regulisana ovom odlukom, primjenjuju se odgovarajuće odredbe Zakona.

Član 24.

(Stupanje na snagu)

Ova Odluka stupa na snagu osmog dana od dana objavljivanja u „Službenim novina Zeničko-dobojskog kantona“.

Broj:
Zenica

PREDSJEDAVAJUĆI

Ćazim Huskić s.r.

O B R A Z L O Ž E N J E

I - PRAVNI OSNOV

Pravni osnov za donošenje ove odluke sadržan je u:

- članu 37. stav (1) tačka f) Ustava Zeničko-dobojskog kantona, i
- članu 63. stav (2) Zakona o turizmu („Sl. novine Zeničko-dobojskog kantona“, broj: 12/22)

II - RAZLOZI ZA DONOŠENJE

Osnivanje i djelovanje turističkih zajednica u Federaciji Bosne i Hercegovine bilo je uređeno Zakonom o turističkim zajednicama i promicanju turizma („Službene novine FBiH“, broj: 19/96 i 28/03).

Ustavni sud Federacije Bosne i Hercegovine, na sjednici održanoj 03.07.2014. godine, donio je Presudu broj: U-34/13 („Službene novine FBiH“, broj: 61/14) kojom je utvrdio da Zakon o turističkim zajednicama i promicanju turizma u Federaciji BiH nije saglasan Ustavu Federacije Bosne i Hercegovine. Ustavni sud FBiH je istom Presudom odredio i prijelaznu mjeru kojom je data mogućnost Parlamentu Federacije Bosne i Hercegovine da u roku od šest mjeseci od dana objavljivanja presude zakonom uredi materiju koja je regulisana osporenim Zakonom, do kada se isti mogao primjenjivati. Rješenjem Ustavnog suda Federacije broj: U-36/13 od 09.12.2015. godine utvrđeno je da navedena presuda nije izvršena.

Zakon o turističkim zajednicama i promicanju turizma u FBiH je prestao da važi dana 30.01.2015. godine, tako da predmetna oblast turizma koja reguliše rad turističke zajednice i promociju turizma trenutno nije uređena drugim propisima, pa se pristupilo izradi kantonalnog Zakona kako bi se zakonski uredilo i ovo pitanje, te prevazišla nastala pravna praznina.

Na nivou Federacije BiH turistička djelatnost regulisana je Zakonom o turističkoj djelatnosti („Službene novine Federacije Bosne i Hercegovine“, broj 32/09). Obzirom da se radi o podijeljenoj nadležnosti, te o činjenici da isti nije uopće tretirao nadležnosti kantona, također i iz tog razloga ukazala se potreba da se na nivou Zeničko-dobojskog kantona obavljanje turističke djelatnosti, sa svim svojim specifičnostima, reguliše zakonom.

Zakon o turizmu je usvojen na sjednici Skupštine Zeničko-dobojskog kantona dana 29.06.2022. godine, Objavljen u „Službenim novinama Zeničko-dobojskog kantona“ broj: 12/22 od 07.07.2022. godine i stupio je na snagu osmog dana nakon objave.

U članu 51. stav (1) navedenog Zakona propisano je „Za područje Kantona osniva se Turistička zajednica Kantona“. U članu 63. stav (2) navedenog Zakona propisano je da

odluku o osnivanju Turističke zajednice Kantona, na prijedlog Vlade Kantona, donosi Skupština Kantona, a pripremne radnje za osnivanje Turističke zajednice Kantona obavlja Ministarstvo (Ministarstvo za privredu Zeničko-dobojskog kantona).

U skladu sa navedenim, sačinjen je prijedlog Odluke o osnivanju Turističke zajednice Zeničko-dobojskog kantona koja se sastoji od sedam dijelova i 24 člana.

U DIJELU I - Osnovne odredbe koji sadrži članove od 1. do 3., reguliše se predmet odluke, naziv, pravni status i sjedište Turističke zajednice Zeničko-dobojskog kantona (u daljem tekstu: Turistička zajednica) i pečat i štambilj.

U DIJELU II – Ciljevi i djelatnost Turističke zajednice, koji sadrži članove od 4. do 7. reguliše se svrha osnivanja, ciljevi, djelatnost i zadaci, i ovlaštenja u pravnom prometu Turističke zajednice. U skladu s članom 3. Zakona o registraciji poslovnih subjekata u Federaciji Bosne i Hercegovine (“službene novine Federacije BiH”, broj: 27/05, 68/05, 43/09, 63/14, 32/19-Odluka US i 85/21) u glavnu knjigu registra nadležni registarski sud unosi djelatnost subjekta upisa sa šiframa odjeljaka djelatnosti predviđenim važećom klasifikacijom djelatnosti. Stoga su ovom odlukom definisane šifre djelatnosti Turističke zajednice prema Odluci o klasifikaciji djelatnosti Bosne i Hercegovine, te opisno pobrojani i zadaci Turističke zajednice u skladu sa Zakonom.

U DIJELU III – Organi Turističke zajednice, koji obuhvata članove od 8. do 14. definisani su organi Turističke zajednice kao i njihov mandat, nadležnost, sastav i odlučivanje, kao i organizacija, način rada, prava i obaveze uposlenih.

U DIJELU IV – Finansiranje Turističke zajednice, koji obuhvata članove 15. i 16. utvrđena su sredstva za rad Turističke zajednice i odgovornost za obaveze.

U DIJELU V – Akti Turističke zajednice, sastoji se od članova 17. i 18. u kojima su navedeni akti Turističke zajednice i definisan je i statut Turističke zajednice. Akti Turističke zajednice koji se donose uz prethodnu saglasnost Vlade, dostavljaju se Vladi putem Ministarstva u skladu s Poslovnikom o radu Vlade (“Službene novine Zeničko-dobojskog kantona”, broj: 10/21).

U DIJELU VI - Prestanak postojanja Turističke zajednice, koji obuhvata članove 19. i 20. regulisano vršenje nadzora nad radom Turističke zajednice kao i na osnovu čega prestaje postojati Turistička zajednica.

U DIJELU VII - Prijelazne i završne odredbe, koji se sastoji od članova 21., 22., 23. i 24. i istim je regulisano imenovanje nadzornog odbora i vršioca dužnosti direktora na kraći period, troškovi osnivanja i početka rada, ostala pitanja i stupanje na snagu. Imenovanja na kraći period uređena su Zakonom o ministarskim, vladinim i drugim imenovanjima u Federaciji BiH („Službene novine Federacije BiH“, broj: 12/03, 34/03 i 65/13) i to su su imenovanja na najviše tri mjeseca koja se ne mogu ponoviti.

III - FINANSIJSKA SREDSTVA ZA PROVOĐENJE ODLUKE

Za realizaciju ove odluke nisu potrebna dodatna finansijska sredstva.

Očekivani troškovi za osnivanje Turističke zajednice su cca 2.000 KM i odnose se na troškove notarske obrade i troškove za upis u sudski registar, a obezbijeđena su na poziciji Ministarstva privrede, kod: 613900 – Ugovorene i druge posebne usluge. Predlaže se Skupštini Zeničko-dobojskog kantona da donese navedenu odluku.